

schlechte geflossen / zugeeignet / vnd nach dem Sündflusß vnter sie in drey gleiche theil getheilet / Als Asia / Europa / vnd Affrica.

Asia fahet an von Mittag / vñ zeuchet durch Aufgang d' Sonnen / vnd endet sich gegen Mitternacht / Dis theil Erdtrichs hat Sem von Noe empfangen / vnd mit seinen sieben vnd zwenzig geschlechtern ingehabt vnd besessen / von denen die freyen Menschen entsprossen seynd.

Europa das ander theil des Erdtrichs / entfahet seinen anfang von Mitternacht / vnd erreicht sein Ende gegen der Sonnen Nidergang / vnd hat Japhet dis theil Erdtrichs von Noe eingenommen / vnd mit seinen fünffzehen Geschlechtern ingehabt vnd bewohnet / vnd ist der Adel / Ritter vnd Rittermessigen auß jnen gewurkele.

Affrica das drit theil des Erdtrichs / hat seinen Anhab von Nidergang der Sonnen / vnd erstreckt sich bis zu anfang des Mittags. Diese Gegne ist Cham zugetheilt / vnd hat die mit seinen dreissig geschlechtern besessen vnd verwaltet / vnd seynd von ihm die Baur / die Knecht / das seynd die Eigenleut / entsprossen.

Wie die drey obgeschribenen Theil ferner vnder scheiden seind.

Diese oben angezeigten drey Theil der Welt / seynd fürter vnder schieden vñ getheilt worden in Lande / die Lande in Königreich / die Königreich in Fürstentum / Herzogthum / Marggraffschafften / Herrschafften / zc. Dieselben in Gegne / Felder / Gemarcken / Gewanden / Ecker / Weingarten / Morgen / Zueharten / Manßmat / Tagwerck / zc. Demnach hat ein jedes Land / Statt / Fleck / Dörffer / Weiler / zc. in seim Felde / gewenden / eigen theilung / eigen Mehrueten / maß vnd namen angenommen / wie Barro in seinem ersten Buch / das er zu Fundana seiner Haußfrauen von den Bewerischen dingen / im zehenden Capitel schreibt / da er anzeigt / das maß vnd Namen in Hispania vnd in Campania / zc. gebraucht.

A iij

De